

四庫全書

集部

欽定四庫全書

集部

范太史集卷八

五至

詳校官庶吉士臣何道沖

檢討_臣何思鈞覆勘

總校官進士臣楊懋珩

校對官中書臣嵇承志

謄錄監生臣蔣錦城

欽定四庫全書

范太史集卷五

宋 范祖禹 撰

表狀劄子

乞避親狀

六月八日

右臣伏見戶部尚書韓忠彥已除尚書左丞緣臣妻是忠彥妻之堂妹於條合行迴避謹錄奏聞伏候敕旨

二十

日內批特不許迴避不得為例

上殿乞避親劄子

十六日
延和殿進呈

臣近奏乞與左丞韓忠彥避親準尚書省劄子奉聖旨
特不許迴避者臣竊見近歲言事官與執政有親不以
戚疎近遠例皆迴避今蒙陛下待以不疑在臣愚分尤
難安處伏望聖慈特依近例許臣迴避

同吳司諫上殿
宣諭云卿等公

心必不為親戚不言且
為官家文字不須進入

辭免中書舍人狀

七月八日

右臣準閣門告報已降告命除臣中書舍人者臣蒙陛
下擢任諫職未及兩月曾無毫分之補職事實未舉修

夙夜以思未知所處今蒙進擢西省華要之職在臣愚
分深不遑安兼臣自去年蒙恩除起居舍人凡四次辭
免今年三月蒙召試及免試除職亦四次辭免前後不
避煩瀆天聽實以文字不敏不敢當書詔之職今臣愚
執與前無異伏望陛下天地之恩察臣累辭出於至誠
特賜追還告命臣無任惶懼俟命激切屏營之至

辭免給事中狀

十月八日

右臣準閣門告報已降告命除臣試給事中者聞命震

恐無所容措臣竊以門下封駁之職最為要塗比虛其員蓋重此選臣自居言責曾無裨補萬分之一今超越西垣擢置左省臣不唯才識愚陋所不敢當在於義分亦不遑處伏緣臣近上言回河不便乞罷修河司實繫生民休戚數路安危未蒙朝廷辨別臣之所言是非若臣言是乞賜施行若臣言非即當顯黜而論列未及累日遽蒙進官由臣非才不能稱職內省愆咎唯俟譴誅豈敢貪冒復當遷寵伏望聖慈特賜追還新命除臣一

外任差遣

二十三日

臣近奏乞追還除臣試給事中恩命除一外任差遣準
尚書省劄子奉聖旨不許辭免者睿恩深厚天地難踰
臣義有未安敢避煩瀆伏緣臣近論回河不便乞罷修
河司臣所引先帝詔書及陛下昨降罷修河司指揮及
中外人言皆以為非便臣不知大臣何以止信一李偉
之言遂不用先帝詔書及却改陛下先降指揮一切不

恤人言而無故興大役動大衆困擾數十州生靈將來
河不可回民不堪役何變不有何事不生為無窮之費
又有無窮之害而章奏纔出未及累日遽蒙優遷臣竊
惟陛下設置諫官責之以言欲得其忠益若不然其言
而復進其官將何以來天下鯁直之論亦非朝廷黜陟
之典諫官以言責事陛下職在於救正若忘其職業而
唯貪寵利陛下雖不以為罪臣亦何以勝中外四面之
責哉伏望聖慈特賜辨別臣言之是非然後議其升黜

則臣之幸所有告命不敢祇受

三 二十日

右臣近兩具奏辭免除臣試給事中恩命準尚書省劄
子奉聖旨依前降指揮不許辭免者螻蟻之誠未回天
聽伏念臣入侍經幄于今四年擢居諫垣及此累月毫
分無補夙夜不遑遽被誤恩進升左省名品加峻班秩
增隆人臣事君誰不求寵臣以有言不效得罪為宜是
以徬徨未知所處伏望聖慈特賜追還告命除臣一外

任如朝廷姑務含容即乞改授臣京師一閒慢差遣

十二

一日內批依前降指揮不
許辭免二十三日受告

謝給事中表

言責無補宜加詰誅寵典惟行乃被褒進辭不獲命以
榮為憂臣聞帝舜命龍作納言夙夜惟允仲山補王之
袞職喉舌是司門下之官蓋本於此號令之所出納政
刑之所慘舒先帝董正羣司分置二省封駁之任選授
尤艱二聖並明萬邦承式職業粹于羣下治亂在于庶

官臣以庸虛入侍勸講謬塵法從之末濫備爭臣之弊
曾無藥石之言上負耳目之寄遽從西省擢處東臺此
監伏遇皇帝陛下大學日新至仁天覆淵默守道垂拱
視成慮一二之萬機差毫釐於千里罔兼庶慎自爾師
虞黎獻共為於帝臣羣僕交修於后德不遺管蒯俾効
涓塵謹當風雨不渝冰霜自厲庶竭餘生之力上酬洪
造之私

謝太皇太后表

備員諫省曾無補衮之勤進職瑣闥誤被出綸之寵祇
膺褒序深積兢惶伏念臣才不逮人學非造理惟知竭
盡以事上不敢低回而愛身進偶休明擢升侍從濫處
七人之列輒希五諫之功終非藥石之良詎有涓埃之
益復因人之冒進官榮升東掖之華資莞納言之要地
恩無虛授禮有固辭尚不寘於嚴誅終莫回於成命覲
顏而受居寵惟危此蓋伏遇太皇太后陛下德協勛華
功齊任如建大公而御極守至正以治繁登進羣才緝

熙庶績乾坤至大曲成物以无遺日月有明在容光而
必照顧臣孱瑣亦預采收益堅匪石之心庶效捐軀之
節

講筵乞避親狀

五年三月二十二日

右臣伏見新除臣叔尚書吏部侍郎百祿兼侍讀臣竊
以叔姪並侍經筵近世未有此例於臣私門實為榮遇
在臣愚分豈敢違安伏望聖慈許臣迴避特罷講職

二 二十五日

右臣近上奏以臣叔百祿兼侍讀乞罷臣講職準尚書省劄子奉聖旨不許迴避者臣竊惟陛下置講讀之官以備顧問若稍涉物議則無以輔導聖德今臣叔姪並侍左右求之故事未有此比豈敢貪榮以自取戾伏望聖慈特許迴避

三 四月一日

右臣近兩具奏以臣叔百祿兼侍讀臣乞罷講職準尚書省劄子奉聖旨依前降指揮不許迴避者臣伏見太

學博士吳師仁德行純懿經術淵深修身慎獨非禮不動朝廷起之布衣授以學職宜在左右敷陳前訓伏乞罷臣講職擢用師仁稽之士論必以為允敢望聖慈特降指揮

乞避親狀

五月二十六日

右臣伏見司馬康除左司諫臣有女許嫁康之子承奉郎植於今月二十四日已行定禮準敕官員親戚職事相干並迴避今臣與康門下後省及講筵所實錄院並

職事相干合迴避伏乞罷臣職任以協公議

乞免館伴狀

六月十八日

右臣今月十八日閤門告報已降敕命大遼國賀坤成節人使到闕差臣充在京館伴使者伏念臣久苦脾胃之疾經年不愈造朝供職雖粗可勉強竊恐應對使客以病闕事伏望聖慈矜允特賜改差所有敕命臣不敢祇受

依奏

乞郡狀

七月二十四日

右臣輒傾愚懇干冒宸嚴仰恃矜容未即誅譴伏念臣
自去夏傷冷得脾胃之疾經涉一載有加無瘳又積年
苦暑暍之病重以腹疾殆不能勝近累在假曠廢職業
緣臣賦命羈薄受才拙難誤被獎擢叨塵侍從寵祿已
過災病益侵況臣入官以來止為試銜知縣一任自熙
寧後專以修書為職未嘗履歷州郡官政民事多所未
知伏望聖慈察臣悃誠憫臣阨劣特除臣京西一閒郡
使之自效因得休養疾病若幸痊愈未填溝壑誓竭犬

馬之力圖報天地之恩

二八月一日

右臣近上奏乞京西一閒郡自效因得休養疾病準尚書省劄子奉聖旨不允所乞者臣私懇迫切不能自己再瀆天聽無所逃罪伏念臣識智凡近學術疎淺陛下過聽誤加收擢入侍經席于今五年記實史闕亦既再聞臣非不知講書將畢修史垂成臣子之心誰不欲久處朝廷長侍左右臣實以脾疾害於飲食氣力羸劣今

已彌年竊恐向去更難支持遂成膏肓不愈之疾况門下省經筵實錄院皆不可以瘵官曠職數在假告豈敢遑安伏望聖慈察臣至情實非矯飾早賜俞允除臣一

郡

貼黃如蒙矜允欲乞差臣知襄州一次

三四日

右臣近以疾病兩具奏乞京西一郡準尚書省劄子奉聖旨依前降指揮不允所乞者睿恩深厚天地難踰非臣隕首所可上報輒瀝危懇重干天聽臣以樸愚久侍

經席嘗忝諫職進擢東臺曾無絲毫裨益聖德素餐尸祿為罪已多况復疾疢嬰纏心力減耗大懼廢職而煩刑書伏望陛下曲垂父母之慈不違螻蟻之志特賜矜允除臣知襄州一次

乞解給事中狀

九日

右臣近三上奏乞京西一郡準尚書省劄子奉聖旨依累降指揮不允所乞者仰瀆天聰每煩睿訓震悸隕越無所自容臣雖疾病虔遵詔旨未敢更乞外任輒有愚

懇冒昧陳聞臣伏見仁宗皇帝天聖四年初讀唐書侍
讀宋綬乞解勾當三班院以專講勸章獻太后許之神
宗皇帝治平四年仁祖實錄將成提舉韓琦奏修撰王
珪權免學士院諸雜文字呂夏卿宋敏求亦免舍人院
輪直專意筆削遂成大典今臣非才豈敢跂望前人而
兼門下省講筵實錄三職比之同輩過為僥倖加以久
病心力俱耗實恐隳廢職業以重罪戾伏望聖慈矜察
特解臣給事中之任止令兼講筵實錄二職或乞依孫

覺近例領在京宮觀一處庶竭愚慮少裨聖學萬一仍得專精史筆蚤成先帝一朝大典臣不勝幸願

二十四日

右臣近奏乞解給事中之任乞供講筵實錄二職或乞領在京宮觀一處準尚書省劄子奉聖旨令臣權免簽書給事中文字候實錄書成日依舊者聖恩隆厚曲賜優容天地大德未知所報臣以非才兼領三職罄竭愚短非敢避事止以久病心力減耗雖欲勉強實恐不逮

是以冒昧陳情今蒙詔旨權免簽書在臣之私則為僥倖然於事理深所未安伏緣今兩省職事官與昔日知制誥之類職名不同臣豈可居其官而不治其事受其祿而不任其責臣昨奏援引王珪呂夏卿等故事蓋以前輩猶須專一乃得成書臣以疾病止欲比附解罷一職宋綬但以進讀猶許解三班院今講筵實錄於臣疎拙職事已不為少伏望聖慈特解臣給事中除一在京宮觀差遣臣願畢力以供二職螻蟻微誠乞賜矜察累

瀆天聽實非得已臣無任惶懼俟命激切屏營之至

辭禮部侍郎狀

六年九月二十二日

右臣準閣門告報已降告命特授臣試尚書禮部侍郎者臣竊以春官亞卿省部清選必得博聞強識之士達於禮樂制作之原乃可以稽合典常折中論議居是職者古難其人伏念臣學術迂疎識慮卑淺誤被簡拔寢服顯休擢處東臺徒更歲月雖殫薄力無補萬分加以氣耗早衰體羸多病坐慙尸祿深懼瘵官惟襍被以俟

行冀守麾之得請未從譴斥尚荷兼容敢謂眷知復加
遷寵伏望聖慈迴乾坤之施察螻蟻之誠特寢過恩俾
安愚分改授臣一閒慢差遣所有告命未敢祇受

謝禮部侍郎表

備員左省久塵夕拜之班賦政中臺進貳春官之長避
命弗獲居寵為憂臣竊以舜命九官秩宗典禮周分六
職帥屬佐王肅恭神人建保邦國欲稱茲任實難其才
伏念臣識智冥頑術業淺陋猥緣末學誤被聖知入侍

經惟忱已更於六歲進參法從方僅及於三秋徒懷愛
日之誠曾之適時之用報國已窮於薄技竊祿實非其
本心訖無橫草之勤矧有負薪之疾宜絀居於散地乃
升列於清曹此蓋伏遇皇帝陛下懋建大公緝熙庶政
責交修於近輔分小治於羣司堯帝欽明咨百工之允
理文王陟降思多士以圖寧特收一介之微俾預六卿
之亞仍加藩飾以示寵光臣敢不夙夜惟寅服勞匪懈
風雨如晦有隕不渝庶効涓埃仰酬覆載

舉自代狀

十月三日

右臣伏覩左朝奉大夫直集賢院兼侍講吳安詩識慮
清遠學術淵深嚮在諫垣獻言颺切入侍經席進講詳
明臣實不如今舉自代

謝講尚書徹就東宮賜燕表

古文畢講徒殫歲月之勤聖學又新益廣乾坤之業式
頒燕衍昭示惠慈竊以虞夏商周之書出於孔氏之壁
典謨訓誥之作備見聖人之心歷代之所寶藏人主以

為矩範載之行事能自得師恭惟皇帝陛下稟軒皇敦
敏之資法堯舜欽明之德順稽古道遠監前王日御西
清躬勤典學九仞俄成於覆簣三年遂見於通經優寵
儒臣載加禮食肴核惟旅並秩於周筵絲竹之音如聞
於魯宅臣等幸陪勸講每愧空餐適當肄業之終更被
屬厭之賜

謝太皇太后表

經幄侍言方訖帝王之大訓宸慈錫宴實為臣子之至

榮荷天度之包容叨特恩之厯厚恭惟太皇太后德凝
坤載治協離明謹律度以誠身正端源而馭俗申命博
帶之士入講華林之庭竊觀聖德之日新殆與古書而
契合淵默臨朝則體虞舜無為之化恭儉好禮則稽召
公敬德之言庶績其凝九功惟叙固將著見於實效非
徒紬繹於多聞臣等妄陳口耳之知曾乏涓塵之補終
篇甚幸示惠過隆金奏宣和聽鈞天於夢寐皇華命侑
滲湛露於蕭稂深惟稽古之勤罕及逢辰之幸致君有

道當取於百篇報上無窮更祈於萬壽

進神宗皇帝實錄表

竊以書契之興以紀天下之事典謨之作乃見聖人之
功欲垂法於將來在屬辭於信史適當際會預備討論
恭惟神宗皇帝爰自東宮暨升大位孝行同於舜帝友
道比於文王極典學之高明勤治功於旰晷乾健不息
日照方中將追三代之風遽損百年之壽惟規摹之宏
遠有記注之浩繁太皇太后陛下保佑丕基布昭明德

皇帝陛下纂隆下武駿惠先猷申詔儒臣裁成大典臣等誤被聖選愧非史才徒廣記以備言實殫精而竭慮久淹歲月僅就簡編無以發揮經緯之文髣髴緝熙之烈將陳疏宸若蹈冰淵其新修實錄二百卷事目十卷謹隨表上進

乞梓州表

元祐七年五月十八日

臣某言入侍經幄七改歲華違去鄉邦再終星紀輒傾丹赤上瀆高明伏念臣生本遐方才非大器猥緣末學

獲近清光荷天度之兼容竭秋毫而無補誤膺寵典寢
歷顯塗恭遇陛下盛德日新多能天縱蘊神明於默識
集聖智於大成所宜旁求俊傑之才上奉緝熙之學顧
臣淺陋何所發揮大明方中宜收爝火巨浸無際奚取
細流況臣氣耗早衰體羸多病目視昏近幾畫字而不
成骨節支離殆勝衣而弗克精力殫於簡冊夢寐役於
松楸恐填壑之無時唯首丘之是念伏望皇帝陛下迴
乾坤之施察螻蟻之誠特假守於方州俾暫還於里社

儻餘生之未泯庶九死而可酬敢望聖慈特除臣知梓州一次

乞梓州劄子 二十六日

臣近上表乞特除臣知梓州一次伏蒙聖恩賜詔不允仰煩謨訓丁寧誨諭震懼隕越無所自容臣子之於君親義無隱情故不敢避再瀆之罪輒復冒昧陳請臣以庸虛久侍經席積日累月已涉七年陛下天縱聖神日躋睿智高明之度非可管窺臣之所學竭盡無餘肺肝

底裏皆可鑑照顧臣淺陋中無所有繁言複語無裨聖學陛下方躬蹈堯舜壺奧日深宜得儒學之宗道德之老延之西序執經於前敷陳墳素發明聖蘊一辭開折百慮洗然乃可以益新輝光奉承濬哲如臣之比實非其人加之疾病連年心力耗廢若不自揆貪戀寵祿失之一發百發皆棄差之毫釐千里為謬陛下雖欲保全庇護亦不可得伏望聖慈以其久在左右特賜矜允則臣之餘生今日以往皆陛下之所賜也臣無任惶懼懇

切之至

二 六月七日

臣近上奏再乞知梓州一次準尚書省劄子奉聖旨依前降詔書不允所乞者天高聽卑未能感動再三為瀆無所逃刑臣伏思元祐以來與臣同時勸講之臣程頤以人言罷黜孫覺病廢死於揚州顏復司馬康皆死京師而臣抱疾累年日加羸劣形骸若此福祿可知故臣願及罪戾之未聞疾恙之未廢得郡而去一展先臣丘

墓庶幾死無遺恨若未先犬馬填溝壑則臣之報國猶有日也今儒學之英皆在左右宜更詳延俊德旁求巖穴博問遐觀益廣聰明如臣已陳之迹已試之效陛下所悉無補可見伏望聖慈察臣愚誠早賜俞允

辭免翰林學士第一狀

二十日

右臣準閣門報已降告命除臣翰林學士者臣近三奏乞知梓州未奉俞允方欲再露誠懇干瀆聖聽忽蒙遷授恩出非常聞命震恐不知所措臣竊以學士近職侍

從之首文章議論儒者所宗必得天下英材聲稱第一
乃可以厭服人望為國光華臣以樸愚獲侍左右才力
絀薄無所堪任使之解經述史粗能勉強至於文詞實
非所工是以前不敢當書詔之職已蒙聽許今茲禁林
尤為極選重以久嬰疾病形神俱耗豈可強顏秉筆貽
朝廷羞在臣之義必難冒處伏望聖慈特垂天恩追寢
成命檢會臣累奏特除知梓州一次

二 二十五日

右臣近上奏辭免翰林學士恩命乞差知梓州伏蒙降
詔書不允者睿恩隆厚聖訓丁寧在臣之愚何以堪此
臣不惟文學無以過人前已辭書詔之職近又累乞鄉
郡義難祇受兼於國朝故事有不可者伏緣臣叔百祿
見任中書侍郎臣竊見仁宗時翰林學士王洙以兄子
堯臣參知政事避親改侍講學士昨蘇軾除學士承旨
亦以弟轍執政懇請出知潁州今中書政本樞機之地
無不統攝臣若就職理實有嫌伏望聖慈許臣依王洙

蘇軾近例避免臣未敢更乞川蜀遠州欲乞除臣京西
一郡自效誓畢餘生以圖報稱

三 二十八日

右臣近兩奏辭免翰林學士恩命準尚書省劄子奉聖
旨依前降詔書指揮不許辭避者稽違詔命邦有常刑
然臣子之情不敢不竭盡於君父臣竊以避親故事簡
策具存方陛下懋建大公以先天下而臣豈敢貪冒榮
寵晏然自居雖無人言豈不內疚此臣所以不避誅責

至於必辭也伏望聖慈察臣肺肝實非矯飾追還新命
特除臣京西一郡誓殫犬馬之力圖報天地之恩所有
告命不敢祇受

四 七月七日

右臣近三奏辭免翰林學士恩命乞京西一郡準尚書
省劄子奉聖旨依累降指揮不許辭避者瀆煩天聽非
止再三罪不容誅義非得已臣竊以侍從清切莫如禁
林儒者之榮孰不願此況臣一門自叔祖臣鎮叔父臣

百祿前後相望今臣復蒙遷授是為三世迭居此職臣雖至愚豈不思上奉聖神之眷知下為門戶之光寵力欲祈免殆非人情然臣所以不避誅責必辭不已者伏以朝廷有避親之法實關盛衰蓋將垂永世之規非特為一人之計遠則仁祖之世故事甚明近則神考之時韓維亦避兄絳出守藩郡今陛下訓迪在位未嘗不以至公然則祖宗故常君臣所宜共守臣豈可覲顏居職隳廢舊章天下之人不可戶曉竊恐上累朝廷無私之

舉而於臣有貪得幸位之譏此臣之所不敢處也伏望
聖慈矜察特賜收還告命除臣京西一郡他日任使臣
不敢辭報國之心死而後已

范太史集卷五

欽定四庫全書

范太史集卷六

宋 范祖禹 撰

表狀劄子

笏記附

辭免翰林侍講學士狀

十七日

右臣準閣門報已降告敕除臣翰林侍講學士兼修國史者聞命震恐無所容措臣竊以侍講學士之職始於真宗所以延登耆儒尊尚經術自神考更定班制止以侍從兼官元豐以來久虛學士之選恭惟先帝神功聖

德在太史金匱石室之藏今將繼五朝之書成一代之
典考之故事多委輔臣伏念臣以樸學侍經帷以薄才
居史觀徒積歲月訖無勞能間引親嫌懇辭禁職願從
外補少養沈疴乃蒙假以寵名付之事任大懼無以報
塞唯速悔尤方今獻臣宗工在位服采必有傑俊可當
選掄伏望聖慈改授賢才庶協公議所有告敕不敢祇
受

謝翰林侍講學士表

七月

臣某言伏蒙聖恩以臣辭避翰林學士恩命特授翰林
侍講學士兼修國史尋具陳免伏奉詔書不允者辭其
可辭敢忘故事受其可受祇服新恩中謝洪惟真宗初
置講職問學常勤於日昃論經或至於夜分以啓迪於
後人俾監觀於成憲先帝更新治職止命兼官雖因革
之制不同而經緯之文則一惟熙寧元豐之成烈有金
匱石室之舊聞丕顯帝謨尚資史筆追觀列聖之典多
委四輔之臣夫何一介之微膺此二任之重此蓋伏遇

皇帝陛下欽明文思齊聖廣淵如日方中法天不息謂
二帝三王之道當窮極於高深一祖四宗之書已光昭
於永久惟念終於典學聿追孝於前文以臣夙侍書筵
叨塵史觀曲加寵數用示眷留昔魯繆公之於子思亟
饋鼎肉燕昭王之於郭隗改築金臺二子者或以無人
乎側而不能安或欲致士於遠而先為始如臣陋學敢
望古人非懷人爵之可榮竊喜聖心之不倦

謝太皇太后表

三請鄉邦莫遂告歸之懇四辭禁職獲伸引避之文成
命曲迴明綸再降省循非稱震悸交深臣竊以在昔文
武之興本由任如之聖繩其祖武詒厥孫謀教誨之勤
詩書所述恭惟睿德光越前聞大公如天地之無私至
明如日月之必照保佑元聖躋登泰寧思出入起居罔
不欽故左右前後惟其正篤先朝之成烈有太史之陳
編申敕司存俾加論次如臣淺陋曷副選掄此蓋伏遇
太皇太后陛下丕冒羣生答揚列聖以正君心為定天

下之本以守國典為固後嗣之基惟廸前人之光以成
昭子之法兼收末學俾贊大猷重念臣病骨支離壯心
消落周南一紀已期終老於巖林書殿七年竊覲歸榮
於桑梓分安閒散廼寘高華臣敢不勉企前修益堅晚
節庶圖薄效仰答至仁

笏記

臣伏蒙聖恩特授翰林侍講學士兼修國史者侍言經
幄特升嚴近之班汗簡史闡俾綴緝熙之典此蓋伏遇

皇帝陛下道法堯舜孝承祖宗永言若昔之猷仰對在天之烈夫何重任猥屬非才當勉竭於衰疲庶少酬於造化

又

執秩經帷奉邇英之典學紬書史觀揚神考之烈光顧臣何人獲預茲選此蓋伏遇太皇太后陛下坤元至正天造無私積思六經日進聖神之德垂鴻千歲眷言簡冊之文永肩報國之忠益勵致身之節

謝賜對衣金帶鞍馬表

臣某言伏蒙聖慈特賜衣一對金腰帶一條金鍍銀鞍一副馬一匹者錫六命之章仰勤司服加三接之禮進視康侯循已無堪在顏有覲伏念臣布韋筮仕徒步入官經術空疎謝桓榮之稽古史才淺陋慙倚相之讀書驟升清切之班復被便蕃之澤犧尊所棄飾以青黃弱狗已陳加之文繡此蓋伏遇皇帝陛下顓俊尊帝養賢及民藩飾羣臣寵綏四海德必稱服愧無君子之容負

以乘車當戒小人之寇

謝太皇太后表

華林勸講益親咫尺之威文陛對揚更被龍光之渥省躬非稱拜手若驚伏念臣寬褐一夫疲駑十駕衣緼袍而不恥每欲書紳馭款段以言歸敢蘄乘駟豈意艸茅之質併蒙車服之華此蓋伏遇太皇太后陛下章物采以納民重爵祿以勸士既錫之福又昭其文同緇衣之好賢授之館粲異白駒之食藿加以繫維誓竭忠勤仰

酬眷禮

進神宗皇帝御筆文字表

六年十月四日

臣某等言先奉聖旨編修神宗皇帝御筆文字今已了畢者出而為詔見王者之深心言則成文表聖人之能事著為軌範屬在繼承恭惟神宗皇帝天縱聖文神資睿斷體虞舜之大智躬夏禹之克勤經緯萬機焦勞百慮自朝至昃而不遑暇食昧爽待旦以啓迪後人號令惟行若風雷之鼓舞指麾所定如日月之照臨惟門下

省審之司實王命出納之地欽承聖畫洞察物情謨訓
具存真遊已遠恭惟太皇太后陛下皇帝陛下並明御
極濬哲在躬適追燕翼之謀仰對丕承之烈將觀成式
以起治功申敕司存俾加紬次編之簡冊用資乙夜之
觀列於圖書永為大訓之寶臣等謬居職業幸預討論
迄奏成篇愧無薄效其御筆十卷目錄一卷計十一冊
謹具進呈

辭賜茶合狀

八年二月十日

右臣伏蒙聖慈以臣進神宗皇帝御批真筆特降中使
賜臣茶一銀合者伏緣三省同進先帝宸筆臣以門下
後省舊職亦預上殿所進止是七件在臣殊無絲髮之
勞今茲隨例受賜實慙面目伏望聖慈許臣回納庶安
分守則臣蒙被睿恩過於拜賜多矣

二十六日

右臣近奏乞回納賜到茶一銀合準尚書省劄子奉聖
旨不許辭免者臣前後受賜未嘗敢辭今所進神宗皇

帝真筆不唯文字至少與中書尚書省不同兼以實無微勞是以不敢避煩瀆之罪伏望聖慈除本省主行人支賜外特降指揮許臣回納

辭免翰林學士兼侍講學士狀

四月二日

右臣準閣門報已降告命特授臣翰林學士兼侍講學士知制誥者臣以樸學久侍經帷前蒙誤恩擢處禁職既以親嫌引避天造曲成特修廢官俾專講勸先帝大典付之論撰兼此二任懼不克堪而曾未暮歲復承人

乏顧慙淺陋每簡聖明重念臣早衰多病心力減耗使
之執經述史尚可勉強至於詞翰實非所工誠不足以
塵汙玉堂之禁重兼金華之職矧今儒學之英布列中
外可備此選不無其人伏望皇帝陛下察臣懇誠特回
睿聽追還成命俾安舊職亦所以全覆其短不違所長
庶殫薄力少圖報效所有告命未敢祇受

二六日

右臣近具奏辭免翰林學士兼侍講學士恩命伏蒙降

詔書不允者仰煩睿旨訓諭丁寧內省庸虛伏深震畏
輒瀝愚懇再瀆天聽臣伏見仁宗之初孫奭為侍讀學
士凡七年乃兼龍圖閣學士又三年以本職出知兗州
馮京避親除侍讀學士後為翰林學士不兼侍讀神宗
之初司馬光呂公著皆以翰林學士兼侍講初不兼學
士之職臣叔祖鎮事仁宗英宗再入翰林治平中以侍
讀學士出知陳州神宗召還復為翰林學士亦止兼侍
讀不帶學士臣於去歲蒙除禁職聖恩許避親嫌改授

侍講學士今蒙復申前命遂兼舊職是臣因避親嫌不一
一暮歲得兩學士在臣之分夫豈敢安朝廷如不許臣
辭免新命又以臣久在經筵仍令兼職即乞依舊例止
兼侍講不帶學士則於職事無改而不違典故少安分
守庶免罪戾貪冒天寵臣無任慙懼激切屏營之至

謝宣召入院表

右臣今日翰林待詔秦訓至臣所居奉聖旨召臣入
院充學士者使節光華誤被以旌之召臣衣顛倒豈容

俟駕之行閭里生榮搢紳動色臣竊以謀猷入告於內
是謂論思號令罔有不臧實繫文翰自唐世始命名此
職及聖朝尤慎擇其人宜得宗工進為治表如臣者學
雖為己才不逮人蚤塵儒館之遊久備書筵之訪徒勤
夙夜無補涓埃五歲乞骸固已慙於疏廣九年入侍何
敢望於桓榮間引親嫌獲辭禁職復膺前命殊匪初心
此蓋伏遇皇帝陛下天縱聖神日躋睿智德剛健而篤
實學緝熙于光明登進衆賢兼收一介俾陳薄力以助

鴻猷臣敢不策勵疲駑激昂忠義苟可益國其敢愛身

謝太皇太后表

王人將命天詔頌恩望宸極以拜嘉即私庭而示寵省
循非稱偃僂若驚臣竊以正王者之心慎在左右鼓天
下之動繫乎文詞唯茲翰墨之林實首論思之地仰膺
異選宜得偉人如臣者經術不明藝文無取金華勸講
獲親日月之光石室紬書俾述乾坤之業曾蔑聞於績
效乃采入於禁嚴此蓋伏遇太皇太后陛下洪覆無私

大明旁燭急堯舜之先務哲在知人躬任如之思齊寧
於多士況臣一門叔姪三世後先起下國之孤生受累
朝之殊遇負荷豈勝於山嶽糜捐何啻於毫毛臣敢不
彌激儒衷益堅素守誓不渝於終始庶少答於生成

笏記

臣蒙恩特授翰林學士知制誥者數言經幄無裨典學
之勤視草詞林實玷右文之選避命弗獲居寵惟憂此
蓋皇帝陛下慮憲祖宗面稽堯舜克禔厥后無競惟人

思廣攬於羣才故曲收於末學唯當盡瘁以答殊私

又

西學侍經無入神之精義北門掌誥非華國之懿文祇
荷寵靈交深愧汗此蓋太皇太后陛下照臨區寓擁佑
聖神官不及私人惟求舊無管蒯之或棄同茅茹以並
升冀竭微誠仰酬鴻造

謝賜對衣金帶鞍馬表

臣伏蒙聖慈以臣入院特賜衣一對金腰帶一條并魚

袋金鍍銀鞍轡馬一匹者司服頒衣以儀辨等飛龍出
駿凡賞眡功顧惟何人亦預此賜伏念臣文采不足以
自表學問不足以有行軒冕之來實惟絕意文繡之美
不願施身已叨儒者之極榮復備邇臣之異數此蓋伏
遇皇帝陛下慎司名器訓迪臣工以為都士之容宜有
常而不貳君子之乘欲既閑而且馳故於侍從之聯特
加蕃庶之錫書紳自儆惟敬慎於威儀希驥為心當載
加於鞭策

謝太皇太后表

使輶趣召入居文翰之司宸扆對揚薦被龍光之渥省躬非稱拜手若驚伏念臣短淺凡材顛愚樸學謬塵法從誤簡聖知驟膺識拔之私復荷便蕃之錫此蓋伏遇太皇太后陛下坤元廣載允澤旁流道在寶慈人無易物重金飾帶特頒上褚之珍錯綵成羈仍輟內閑之駿仰愧崇賢之禮難逃致寇之譏惟勉勵於疲駑庶少酬於覆露

舉自代狀 十八日

右臣蒙恩授前件職合舉官自代伏覩國史編修官著作郎集賢校理國史院檢討張耒文章瑰瑋論議閎博必能發揮典誥為國光華臣實不如今舉自代

謝勅設表

二十四日

享有加籩雖循故事與之禮食以示優恩惠浹賓筵榮生官次伏念臣挈瓶小智挾筴陋儒蓬革桑樞進處玉堂之禁藜藿糲食驟加雕俎之珍於臣無饋肉亟拜之

勤而人有既醉太平之行此蓋伏遇皇帝陛下重祿勸士大烹養賢稽虞書膏飫之文從周家忠厚之禮食啣鹿於苹野俾得盡心觴鷄鷩於魯門愧非所養唯當夙夜圖報恩私

乞郡劄子一 九年三月二十五日

臣輒瀝誠懇仰干睿聽退省僭瀆無所逃罪臣自熙寧之初受詔修書先帝末年擢寘儒館陛下嗣位寢加簡拔經筵史館併兼二任遂塵禁近竭力無補而不離文

字之職二十五年兩目昏闇幾於失明早衰多病心力損耗自元祐五年任給事中日乞知襄州一次六年七年又累乞知梓州一任皆不蒙開可臣實何人誤被眷知固當盡死以圖報稱而臣目疾愈甚衰病日加實懼精力不逮瘵官廢職雖填溝壑無以塞責重念臣自入仕以來未嘗歷官州郡今筋力疲憊未敢遠乞近鄉差遣伏望聖慈特除臣京西一郡俾之展力自效因得休養羸疾儻未即死則臣之報國猶有日也伏祈天恩特

賜矜允臣無任惶懼激切之至

二

臣昨日因上殿面陳至懇伏蒙聖諭不須入文字臣受
陛下殊常之知雖隕身喪元未足為報固當虔遵詔旨
靖共職事然臣竊伏自念入侍經席於今年自元祐
以來侍從之臣得在陛下左右無如臣之久者豈可貪
冒天寵處之晏然夙夕傍徨不能自己是敢干犯嚴憲
剖列私誠伏望聖慈終賜保全特除臣外任一次臣無

任恐懼俟命之至

三 四月五日

臣近上奏乞除京西一郡伏蒙聖慈特降詔書不允捧
讀震懼無地自容輒復傾竭愚懇干瀆天聽臣伏見仁
宗乾興之初孫奭入侍經筵至天聖九年出知兗州祖
宗之時侍從出入蓋示優容非以在外為疎也今陛下
聖哲天縱輝光日新而臣至愚無與經術自初入侍今
九年矣羸薙多病心神衰耗目視昏闇日甚一日是以

不勝螻蟻之誠微幸大恩特許外任俾效薄力因得少
遂休養庶幾所疾不至沈痼未即填委溝壑猶當麋軀
隕首仰酬天地之造伏望陛下曲迴睿聽早降俞旨臣
無任懇切俟命之至

四九日

臣近兩具奏乞外任準尚書省劄子奉聖旨依前降詔
書不允者再三為瀆罪不容誅仰恃寬仁亮其誠實伏
念臣先於元祐五年八月兩具奏乞京西一郡又奏乞

知襄州一次六年三月兩奏乞知梓州一次七年五月
六月四奏乞知梓州三奏乞京西一郡然則懇請補外
乃臣素心非始於今日也伏望聖慈察臣螻蟻之誠憫
臣犬馬之疾累煩宸聽為罪已多曲垂天恩早賜俞允
除臣京西一郡臣無任惶懼激切俟命之至

謝除龍圖閣學士知陝州表

紹聖元年四月

北扉入直已竊玷於華塗內閣延登復謬塵於近列付
以民社處之藩維祇荷寵私伏增震懼伏念臣受材謏

薄逢世休明學不足以造微文莫能於行遠徒以久陪
勸講誤被眷知訖無橫草之勞素有負薪之疾荆章屢
上請郡以行詞禁嚴凝獲解論思之職河圖祕邃猶叨
侍從之班仰惟天地之仁難圖螻蟻之報此蓋伏遇皇
帝陛下欽明稽古睿智如神迴日月之光幽深必照廓
山海之度細大兼容憫駕力之已疲施鴻恩而下濟臣
敢不激昂晚節砥礪初心益誓麋捐仰酬覆育

謝對衣金帶鞍馬表

伏蒙聖慈特賜臣衣一對金腰帶一條金鍍銀鞍一副
馬一匹者延閣升華搢紳以為榮遇明廷拜賜車服加
於罔功伏念臣寬褐陋儒衡門賤士仰際亨嘉之會獲
親咫尺之威累塵侍從之班重被便蕃之澤此蓋伏遇
皇帝陛下寵綏四海藩飾羣臣爵賞所以勸能恩禮欲
其稱事臣敢不省身知愧彌堅報上之忠執策忘勞益
勵首公之節

笏記

臣伏蒙聖恩特授臣龍圖閣學士知陝州軍州事者伏
念臣蚤緣樸學久侍清光誤被聖知累塵法從獲避北
門之直復躋內閣之班此蓋皇帝陛下大德兼容至明
委照察丹衷之有素垂洪造以曲成誓竭疲駑仰圖報
稱

陝州謝到任表

伏奉告命差臣知陝州軍州事於今月二十六日到任
上訖對揚宸宇方違遠於清光分職藩維已布宣於寬

詔伏念臣蚤緣末學誤被眷知經幄九年無發明於古
訓史闡十載獲紀述於神功非堯舜不言竊慕責難之
義惟祖宗是憲仰禋求助之明日月之光螢爝何補乾
坤之德繪畫難工迫衰疾之交侵瀝懇誠而屢瀆獲解
近嚴之職猶塵侍從之班惟陝服之舊邦有召公之餘
化西當蜀道東邇洛郊稍即便安良為優幸此蓋伏遇
皇帝陛下欽文稽古濬哲在躬育德新其輝光典學念
於終始謂臣久備顧問每傾竭於肺肝深簡睿明實照

知其悃悞曲從所欲用示至公臣敢不上體宸慈俯求
民瘼庶有承宣之效少寬宵旰之憂

國史院取索實錄草沓奏狀

六月二十三日

今月二十三日準尚書省劄子檢會提舉修實錄呂
大防劄子奏臣昨奉敕提舉修撰神宗皇帝實錄今
已成書竊聞舊例所修實錄草沓史官各收一本照
證今來本院所修實錄草沓合依舊例又緣別無公
案見得欲望聖慈特許依例除定本外將見在草沓

各分一本與見在提舉修撰官以備照證外餘依前
降指揮焚毀取進止黃貼子稱如蒙賜允委不傳寫
漏泄元祐六年十月十二日奉聖旨依奏六月十八
日三省同奉聖旨令范祖禹將所得草沓限當日如
法封角差得力人管押遞鋪轉送赴修國史院送納
如有傳寫到別本亦同封角送納或轉寫與他人即
令自陳如輒隱留當重行貶責者

右臣尋依準尚書省劄子內聖旨指揮將所得草沓并

事目共二百一十沓並於當日如法封角共計五籠差
職員十將各一人管押遞鋪轉送赴修國史院送納去
訖外即無傳寫到別本及不曾轉寫與他人委是詣實

謹錄奏聞

并申尚書省照會及申國史
院乞依數交割訖公文回示

貼黃草沓外有官簿五冊係是院例檢閱實錄文
字亦同分到不敢隱留今并送納合具奏知

開封府界居住報應國史院取會文字狀

今月二十七日準尚書省劄子龍圖閣學士左朝奉

大夫范祖禹已降敕命差提舉亳州明道宮左朝奉
郎充集賢校理黃庭堅已降敕命差管勾亳州明道
宮六月十八日三省同奉聖旨各於開封府界居住
就近報應國史院取會文字

右臣尋依準前項聖旨指揮已交割本州公事與通判
管勾訖見赴發前去開封府界居住聽候指揮報應國
史院文字次謹錄奏聞

永州謝表 二年三月

臣某言臣於正月五日準告責授武安軍節度副使永州安置尋於七日起離開封府界於今月二十五日至永州公參訖者罪惡盈積重於丘山仁聖寬容厚侔天地伏讀訓戒感極涕零伏念臣鄙野陋儒荒唐末學往承人之進備官聯紬太史金匱石室之書紀先帝成功盛德之事才不稱職罪豈容誅無以仰述對天之休共成垂世之典實由愚闇自速顛隳宜正典刑難逃顯戮尚蒙全貸投畀幽遐此蓋伏遇皇帝陛下法唐堯之至

仁體虞舜之大智以好生為德故刑罰必主於輕以不
忍為心故昆蟲亦保其命特屈士師之議弗加蕭斧之
誅禹下車而泣辜湯開網而祝獸重念臣稟生素弱賦
命多奇疾病有年死亡無日今茲越洞庭重湖之國鄰
桂嶺炎瘴之鄉形魄雖存喘息殆盡敢不剗心念咎刻
骨銜恩螻蟻至微誓答乾坤之施犬馬雖斃永懷帷蓋
之仁

賀州謝表 三年十月

臣某言臣先蒙責授武安軍節度副使永州安置準告責授昭州別駕賀州安置臣已謝恩祇受即起發赴貶所於十月十七日到賀州公參訖者竄投湘浦痛省咎讐流放災荒尚寬誅殛仰荷全貸伏切涕零伏念臣賦性至愚受恩過溢頃居近職嘗有瞽言不慎發於樞機宜卽刑於鈇鉞聖心惻隱訖至累年天造涵容難遏公論由臣迷罔失道狂惑妄行自災厥身以陷大戾百生何補萬死猶輕伏遇皇帝陛下天地施生日月臨照躬

蹈堯舜心存禹湯推文王葬骨之仁軫仲尼埋犬之惠
雖當殄戮猶或哀矜賜以餘生屏之裔土已投身於魑
魅之域將淪骨於瘡瘍之鄉儻及泉而有知猶結草以
圖報

范太史集卷六

欽定四庫全書

范太史集卷七

宋 范祖禹 撰

表

代王君貺宣徽北京謝上表

偃藩全魏掌籥留都選授所躋寄付尤重

中謝

伏念臣

識非慮遠才不兼人被遇三朝歷年四紀竊隆名於薇
省視峻秩於台司往歲詔自西都日朝法展宣聖猷而
何補尸厚祿以空慙輒貢需章懇祈閒職寬恩從欲蕃

錫示慈特置使於祠庭俾即安於私館間者祇奉召節
入對邇顏幸陪宗祀之儀獲預駿奔之列天光委照宸
眷曲臨特頒渙汗之恩復假北門之守越從散地併總
劇權此蓋伏遇皇帝陛下盛德日新至仁天覆責實羣
后分治九圍眷朔土之奧區為浚都之巨屏大河斯控
重兵所屯常輟元老之臣俾居連帥之職夫何圖舊猥
及匪能重念臣久齒近班三領茲任撫綏之要鎮守之
宜雖素乏於智謀嘗粗經於心目敢不益堅晚節彌激

懦衷勉企前修仰酬洪造

謝敕書獎諭賜銀絹表

以下代司馬溫公

臣某言伏蒙聖慈以臣編修公卿百官年表成書降敕書獎諭仍賜銀一百兩絹一百疋者奏篇甫上褒詔爰頒荷寵若驚省躬無措

中謝

伏念臣淺才末學苦節孤

忠久塵侍從之班曾乏猷為之補頃膺睿旨俾纂舊章恭惟祖宗創業垂統之難邦國立政任官之要必表年而紀月可鑒古以驗今略舉宏綱庶存成式淹留累歲

紬次終篇仰稽乙夜之觀方虞曠職之咎敢期溫詔發
自淵衷錫外府之貢金加丘園之貢帛載惟虛受采切
覲顏此蓋伏遇皇帝陛下順考百王丕承列聖德剛健
而篤實學緝熙於光明眷執簡之微勤形贊書之重獎
寵踰華袞既稽首以拜嘉賜厚百朋實無功而冒賞

謝再任崇福宮表

囊奏上陳實為貪祿黷聰垂聽亟沐頒恩仰荷寬優伏
增兢悸伏念臣器非適用學不知方被遇三朝叨塵二

禁辱天光之顧問侍經席之從容亦嘗委總憲司訖無
報稱擢陪樞府終獲懇辭剖竹雍都蔑聞於治效分臺
洛邑幸養於沈疴仍再領於祠庭遂十更於歲籥頃自
受命先帝俾刊舊聞迨陛下之續圖發德音而繼志而
臣攜藁在外奏篇未終蓋簡冊之浩繁致歲時之淹久
雖官守無事慙四體之不勤而史筆專精實寸陰之是
惜懼先溝壑以負恩知久去班行顧其他而無補坐糜
祿廩常自訟而靡遑尚或無厭曾不知恥輒披私懇輕

冒宸嚴豈謂皇帝陛下大德包荒至明燭遠罔責再三
之瀆曲垂開可之私蓋特出於異恩故不拘於畫法乾
坤至大雖萬物皆遂其生雨露所私或一夫獨被其澤
惟顓愚之無狀容僥倖以滋多臣敢不深戒晏安祇勤
夙夜畢精撰述圖報生成

慰山陵禮畢表

臣某言伏覩今月十日慈聖光獻太皇太后山陵禮畢
者溥天同軌有嚴聖后之喪卜壤因山備盡孝孫之志

寢宮長掩廟祏惟新臣某誠哀誠懼稽首頓首恭惟皇
帝陛下行過高宗念深文母極奉終之大事懷追遠之
至哀瞻容衛以如存痛音徽之不返原陵永固與天地
以無窮祀享深思惟春秋之匪懈伏望順禮之變卒哭
以時加養體之膳羞護如神之志氣上承宗廟下庇羣
生凡在臣民不勝懇願臣屬居官次阻覲闕庭瞻望宸
極臣無任悲隕激切之至

謝四任崇福宮表

自天有命如地兼容祇荷寵私伏增汗愧

中謝

伏念臣

性非語上學昧造微仰會聖朝繆塵侍從久去近嚴之
列曠修臣隸之勤荐領祠宮坐貪天祿而年齡逾邁齒
髮益衰疾疢交攻形神日耗唯職思於簡冊庶上助於
謀猷敢期復霈厚恩俯從私欲此蓋伏遇皇帝陛下大
明委照罔間幽遐洪造曲成不遺品物收替履而未棄
憫蒲柳之先凋特加異於常倫俾養痾於散秩顧勤勞
之靡效曷報丘山冀撰述之有成少裨毫髮

辭免轉正議大夫表

中天霈澤近輔書勞亦及罔功豈容虛受伏念臣素無
他技唯罄孤忠誤蒙累聖之知寢服近僚之列終因人
乏進貳宰司先帝審訓羣臣靡預誓言之末陛下嗣膺
大寶曾無翊戴之勤豈弗畏於多言詎敢當於懋寵矧
乃方任人而立政惟即命以記功將深戒於官邪宜先
從於近始伏望皇帝陛下慎司名器申勸臣鄰救出綽
之過恩亮循牆之愚懇爵惟馭貴免上累於至公賞必

及勞庶率由於舊典

上太皇太后表

仁惟圖舊賞異及勞義所當辭情難冒處伏念臣早緣
末學被遇累朝之稽古之令猷無致君之遠業入陪經
幄久親日月之光出領祠宮實荷雲天之施會慈宸之
御極登嗣聖以承祧謨膺之使之求擢預贊襄之列屬
寵褒於近弼特序進于文階顧無橫草之勤均被出綸
之渥輿情共駭內訟靡遑伏望太皇太后陛下洪造聽

早至明燭隱慎守馭臣之柄無輕出器之名昭示大公
輟已行之成命少安遇分息被已之深譏

謝表

離明繼照允澤旁流祇受以還震惶無措臣聞以賢詔
爵則民興行誼眡功為賞則下絕覬覦故德盛者其位
隆力勤者其報厚勸沮斯在授受靡虛伏念臣學不適
時才非經世謬塵近列最後諸臣辱體額之兼隆竭股
肱而無補屬舉懋官之典咸疇衛上之勞績用蔑聞褒

章誤及雖危衷之備列終成命之莫迴居寵無名在顏
有覲此蓋伏遇皇帝陛下馭臣惟禮厚下以仁優其進
等之恩責以致身之節乾坤至大均覆載以不遺日月
無私委照臨而盡及永圖報塞唯誓糜捐

謝太皇太后表

明綸誤及渙汗難收弗獲懇辭終慙冒處伏念臣自陪
機政無補聖猷雖夙夜以自彊惟事功之匪立每流年
之是惜加衰疾之所嬰敢以瘵官復當懋賞是以歷陳

故實備述悃誠荐奉詔音兩紆使節對天威之咫尺煩
睿訓之丁寧循走無從彊顏祇受此蓋伏遇太皇太后
陛下至仁勤施大德兼容推均一於鴈鳩昭忠厚於行
葦體乾坤之覆育品物不遺並日月以照臨光明下濟
誓殫駑力仰答鴻私

謝起居減拜表

伏準閣門告報今月十四日內降以臣與呂公著近各
推恩轉官所有將來正謝特令兩拜起居餘免舞蹈仍

於執政官班次後別作一班及自今後凡遇前後殿應
干大起居特令別作一班止兩拜起居恩出非常禮加
異數優假太過慚負愈深

中謝

臣猥以瑣才預聞機政

去春以後疾疹屢生入冬以來飲食漸少迨茲歲序之
首頓覺筋力之衰拜起絕艱朝請殆廢內惟恩紀之重
天地所不能踰退思績效之微絲毫未嘗有立欲避位
則為罪益大欲就列則強力不前朝夕為衆目所觀啓
處無措躬之地敢謂太皇太后陛下仁霑枯朽明燭幽

微特虧著定之儀曲遂形骸之便臣詢諸故老或謂有
舊章然彼皆位躋宰輔之崇德著耆明之美豈臣么麼
所敢比方欲辭則實所不支欲受則自知非分踧踖心
悸戰兢汗流惟仰賴於寵靈冀有瘳於藥物病庶遄已
禮得如初期於竭忠不敢愛死

辭免除右僕射表

非常之寵丕降於中天不次之恩驟加於庸品承命震
駭顧已覲慙伏念臣起自諸生初無遠業學不足以迪

先民之覺才不足以揆當世之宜徒以被遇累朝服勤庶職荷生成於天地無裨補於涓埃惟知直道之可行勉罄孤忠而自守仰屬繼明之始首膺訪落之求拔自散僚進陪機政苟可利國知無不為期於致身死而後已比嬰衰病累貢危誠祈解組以即安庶負薪之可愈忽奉告庭之命併叨躡等之榮越從三事之中擢冠百僚之上力小任重居寵思危義所當辭情難冒處伏望皇帝陛下達聰垂聽劾退任能灼知三俊之心深慮萬

機之委慎名器而不假念后臣之克羣俾逃竊位之譏
獲遂循牆之請

上太皇太后表

誕告外庭眷求同德延登上宰猥屬匪能承命兢惶無
所容措臣聞宰相者所以代天理物論道經邦上和陰
陽下遂動植權衡賞罰藻鑒賢愚大厦棟梁豈容于撓
弱巨川舟楫將濟於艱危苟非得人則必誤國臣早塵
顯仕晚玷近司受恩不貲竭力無補加以疾雖損而未

已老將至而益衰將何以率萬邦黎獻之多居三事大
夫之首內附百姓外鎮四夷非薄力之所堪懼瘵官之
有咎義當引避情敢冒居矧今俊乂孔多耆碩咸在必
有良弼仰當聖心伏望太皇太后陛下考慎其人登庸
於位俾熙帝載以亮天工如臣之愚恐不克稱乞迴明
命以示至公

第二表

囊奏上陳誠辭既竭綸言申答謨訓未俞臣竊惟自古

睿聖之興皇天所祐必有碩輔為時挺生同德協心建
功立事故有堯舜之后乃有稷契之臣有成康之君乃
有周召之佐用能盛烈格于上下鴻名冠乎古今方冊
所稱軌躅可見陛下大明出震至德承祧始在亮陰動
循禮法既親典學日就緝熙實惟億世無疆之休兆民
咸賴之慶宜得先覺之士老成之人左右有民承弼厥
辟同底于道永孚于休如臣之愚曷副茲選而況弗循
位序竄越等夷非拙分之所安亦多言之可畏靡遑夙

夜如蹈氷淵伏望皇帝陛下鴻造曲成至仁廣施聽輟已行之命免貽非據之災詎敢飾辭恭祈報可

上太皇太后表

命出非常義無虛受仰勤睿旨未奉俞音臣伏以在昔仁皇纂圖明肅聽政英祖嗣服慈聖臨朝皆有宗工之臣一德之相誕保皇家之定命發揚文母之徽音是以左右前後罔非正良號令風采咸可稱述克有成烈底於太平民到于今並受其福陛下齊任如之聖保成康

之君坤德靜而直方母教仁而慈愛端拱宸極丕冒海隅敷求哲人式序在位宜得碩輔翼宣大猷臣本非長才又乏遠識誤膺器使進貳宰司不以德功超居鼎鉉將何以對揚休命追配前人安海內於覆盂尊京師而奠枕茲任尤重非臣所堪伏望太皇太后陛下深軫睿慈亟迴成命庶少安於過分免上累於知人

謝表

君勞求賢實出過聽聖職論相非容懇辭拜命以還覲

顏無措伏念臣受才至薄造道匪深無所有以及人唯
自信而行已逮事仁祖被遇英皇膺前席之眷知奉邇
顏之顧問當熙寧之初政近神考之清光唯知至誠可
事明主冀以直道少裨聖時先帝察知不欺聽順所守
恩厚侔於天地禮待優於臣鄰思隕首以無從痛上賓
之已遠陛下大明繼照庶政惟新祇適先猷眷求舊物
越從散地擢寘近司尸厚祿以空慚罄拙謀而無補屬
嬰病苦久賜告休宜從策免之科乃奉庭揚之命延登

揆路進備冢司顧非經世之才實玷代天之任日有萬
幾之慎慮身無數器之兼能辭不獲從居之益懼此蓋
伏遇皇帝陛下虔膺駿命誕受丕基永惟立政之難思
致生民之義謂職業粹於羣下故加體貌之隆治亂在
於庶官必自股肱之助方恭默以思道將垂拱而責成
乃俾瑣才遽當重任臣敢不上體至眷愈堅一心不遺
力於餘生庶少酬於鴻造

謝太皇太后表

成命已行難收渙汗力辭如偽終負覲顏祇受以還震
惶無措臣竊以經綸天下之務必得名世之才斟酌元
氣之和實惟宰物之任德稱其位古難其人矧當宵旰
之勤協濟艱難之治伏念臣早緣末學歷事累朝徒罄
愚忠無裨至化荷天地生成之德蒙山海包納之仁知
其一介之無他惟有寸誠而可錄陛下睿明臨照旁及
幽遐聖政始初眷求耆艾擢居左省參翊大猷豈聞歲
計之有餘未覩時雍之於變卧家嬰疾曠日瘵官猶圖

報於君親已分填於溝壑遽奉告庭之命併加躡等之恩承乏宰司秉均揆路越處百僚之上榮升三吏之崇夫何迂拙之人驟被燮和之寄此蓋伏遇太皇太后陛下布昭明德保佑丕基思濟羣生永綏四海惟責成而任下故獨斷而不謀特出淵衷俾司大柄雖自昔君臣之會遇如此幾希而當今宗社之安危莫斯為重臣敢不夜以繼日公爾忘私庶圖毫髮之勤上答乾坤之施

謝優禮表

非常之禮振古未聞不世之恩容身無所伏念臣自嬰
疹疾久限朝趨違夙夜匪懈之勤廻日月並明之報方
祈病免乃被褒升既孚號于大庭仍賜告於私室相臣
如此舊典所無欲辭則阻覲於天顏欲拜則不虔於君
命進退維谷戰兢履氷實上賴於寵靈幸小瘳于藥物
猶以足瘍為梗體力未勝詔免造朝俾先治事愈弗遑
於寧處終獲遂於懇辭復膺眷注之優曲就疲羸之便
諒非獲已乃敢欽承肩輿及門百辟駭視給扶入殿兩

宮賜存對咫尺之天威幾顛倒於臣節自昔元勲碩輔
大老宗公或以詢謀特加異數豈伊庸瑣乃更超踰顧
茲綿薄之餘生益恐危亡之無日此蓋伏遇太皇太后
陛下覆載侔於天地恩義兼於君親曲垂恤下之仁特
越循常之制雖不能陳力就列猶將使同寅協恭慙非
論道之才叨被改容之禮極臣鄰之殊遇損著定之彝
儀顧雖殺身無以報德斗筭近器螻蟻微誠苟有益於
公家唯常致其死力

遺表

臣聞始則有終物之常理生而必死人之大期垂沒之言哀鳴以敘伏念臣久居散地寢迫頽齡仰被眷知遽當大任伏遇陛下恭默思道垂拱仰成圖庶政之惟艱登衆賢而共濟臣備位上宰總率羣司嬰疾三時卧家累月殊常之寵曠古罕聞每思糜捐無以報稱常欲竭股肱之力繼之以死圖國家之利知無不為雖喘息之僅存唯憂勤而不已而膏肓之苦藥石難攻將永謝於

明時猶瀝陳於愚懇伏望皇帝陛下務學時敏作德日
新體堯舜之欽明視祖宗之憲度奉親思考守位以仁
永建無窮之基益隆有大之業臣雖瞑目猶生之年臣
無任瞻天戀聖哀切屏營之至

上太皇太后表

臣聞凡物之生必皆反本忠臣之死猶不忘君敢陳屬
續之言上達垂帷之聽伏念臣天與愚直性惟拙迂謂
古道之可行排衆言而自信常欲省躬而無愧事上以

不欺被遇累朝照知忠蓋擢居上宰斷自睿神伏遇陞
下思齊任如之功誕保成康之聖延登衆正共濟多艱
而臣受命以來半居病告造朝之際每荷優容蠲其下
拜之勤寵以給扶之禮唯知盡瘁以訖微生聖明之時
獨先隕越太平之業不逮落成沒身有銜報國無所伏
望太皇太后陛下明昭在位保佑有邦御六氣之中和
躋羣生於仁壽疇咨哲又慮憲祖宗沆登濟於成功不
惑移於浮議臣雖終螻蟻之壤猶依日月之光永辭聖

朝無任瞻天戀聖哀切屏營之至

為司馬公休謝賜銀修碑樓表

臣康言伏蒙聖慈差管勾脩建先臣光碑樓入內供奉
官李永言齋賜臣銀二千兩充修碑樓支費者天恩遠
臨優賜下逮銜感泣血未知所報伏念先臣歷事四世
唯堅一心晚節遭遇得行所學是以夙夜盡瘁不敢愛
身勞心役精繼之以死恭惟皇帝陛下天地覆載日月
照臨深軫股肱之虧曲流泉壤之澤恤典之厚超越常

倫寔窆送終哀榮已極今豐碑之建復加頒賚矜念存歿感格幽明重惟先臣儉約清貧未嘗畜積啓手之日家無餘貲聖明燭知俾濟終事伏思前後罕此異恩非臣隕身喪元所可上報待盡丘壟不知所言瞻望天庭臣無任攀戀號歎切屏營之至

為司馬植謝賜錢營葬表

右某言伏蒙聖恩差將作監丞張某催黃河運木就管勾先臣康殯葬仍賜錢一千貫已於今月二十四日遷

葬了畢者忠如皦日痛親志之永沈德及幽泉戴君仁
之下逮伏念臣父康篤行成已力學傳家二聖以似其
先人一旦欲加之顯任而頃因過毀已屬沈痾揜遺恨
而莫伸委深恩於不報自初告卧以至喪還賜藥賜珍
歸賻歸襚優命沓至常分已踰復因匠屬之鳩材俾過
家塋而視堦克襄大事無費秋毫此蓋伏遇皇帝陛下
禮遇臣工孝治邦國將為世忠良之勸豈獨臣父祖之
私往者不亡當有鬼神之結草微而含氣猶知鳥雀之

銜環

謝太皇太后表

致主之心已淪幽壤節終之錫更躡舊章兆協卜之以
時恩殞身而莫報伏念臣祖光以德業名世嘗擢任於
宰衡臣父康以詩禮傳家亦登延於勸講而侈俗方改
哀楊綰之已亡太醫遽臨痛桓榮之未老無祿私室荐
罹鞠凶自啓手足之初至掩窀穸之際君命屢至賙賜
有加復因匠屬之鳩材俾過家塋而視塋殘喘何力秋

毫在官此蓋伏遇太皇太后仁深念功禮不遺舊將博
勸於士類豈曲私於臣門克意紹先獨自期於忠孝纏
哀待盡兩無報於君親

范太史集卷七

欽定四庫全書

范太史集卷八

宋 范祖禹 撰

表狀

慰太皇太后梓宮發引表

以下代富韓公

真馭不留慈顏莫覩奄及祖庭之禮永違壽殿之居恭
惟皇帝陛下感創至深哀號難處儼龍輶之將駕攀鳳
翼以無從凡在食毛同增隕涕臣退居田里阻覲闕庭
瞻望宸極臣無任悲哀隕越之至

慰皇太后表

山陵備禮儀衛啓行祖載及期真遊永遠恭惟皇太后
殿下孝思罔極號慕難居瞻服御以如存望輜輶而不
返凡在臣庶同切哀惶臣退老田廬久違京闕不獲奔
詣宮庭無任悲殞哀越之至

慰梓宮掩皇堂表

昊天罔極率土同哀遠日有期因山制禮掩玉衣於栢
寢闕金殿於泉扃恭惟皇帝陛下號慕難居孝誠備至

痛慈闈之永隔哀真馭之不還億兆之心感涕斯切臣
身居田里心在闕庭瞻望宸極臣無任悲戀殞越之至

慰皇太后表

神山祔卜從先帝以上賓真宅言歸與厚坤而同久恭
惟皇太后殿下奉嚴宗廟致孝皇姑想真馭以如疑痛
徽音之永遠臣退居田里阻詣宮庭臣無任悲隕之至

慰祔廟表

三殿問安音容永隔九虞畢祭廟貌惟新恭惟皇帝陛

下孝極奉先感深追遠天長地久蒙休佑以無窮春禘
秋嘗惟時思而匪懈伏願節哀順變調膳御宜仰奉宗
桃俯安區寓臣阻陪慰覲徒切悃誠

慰皇太后表

仙仗徐還容衣長掩升靈清廟合食宗彝恭惟皇太后
殿下追慕增深哀懷罔極惟春秋之孝享感雨露以時
思臣不獲奔詣宮庭無任悲殞之至

賀同天節表

伏以朱火司辰薰風應律當真聖挺生之旦乃皇家累
洽之期罄海宇以傾心望帝宸而獻祝恭惟皇帝陛下
躬膺駿命寅御寶圖體乾健以當陽鸞離明而布治流
虹紀慶甲觀誕祥文軌所臻華夷胥抃臣叨塵三事親
際千齡退老故廬阻趨魏闕處陶唐之俗豈知帝力之
深效華封之民但祝聖人之壽

乞免赴明堂大禮陪位表

合宮藏事將嚴宗祀之儀宸檢頒恩俾預駿奔之列顧

惟衰耄實切兢惶恭惟皇帝陛下聖孝日躋慈仁廣被
秩百王之盛典因四海之歡心對越上靈陟配昭考執
邁在列拱侯甸以同寅鳴玉造庭儼臣工之率職何圖
求舊亦齒陪祠伏念臣自處田廬久嬰疾疢步趨多梗
拜伏為難懼殞越以無堪顧恪恭而難勉徒荷乾坤之
施曲廻日月之光唯同擊壤之氓預享寧神之福心搖
魏闕莫申顯相之容夢想鈞天阻聽我將之頌臣以老
疾不獲依詔奔詣闕庭無任瞻天感聖戰汗激切屏營

之至

謝詔書允所乞表

昭事上神特降陪祠之召閔勞黃髮復推從欲之恩祇
荷寬優伏增榮悻伏念臣久塵爵位無補聖明雖退老
於故廬實繫心於魏闕尚紆宸眷存沐恩波將嚴享帝
之儀俾預造庭之列虔奉自天之命豈當俟駕而行俯
念殘年素甘多疾奏囊封而懇惻望宸極以跼蹐莫克
駿奔惟懷惕厲伏遇皇帝陛下至仁廣覆大德兼容知

其筋力之衰既難為禮免其道路之苦俾遂養病頒溫
詔以撫存荷清衷之矜允禮加舊物風厚宸區冀畢餘
生仰酬鴻造

賀明堂禮畢表

五室奉祠嚴祖宗而陟配諸神受記祚邦國以流光熙
事備成普天同慶恭惟皇帝陛下虔恭寶位駿惠先猷
澤浸羣生化孚四表建大中而順帝茂馨德以事神載
謀載惟祇率精禋之典我將我享式隆孝治之風物采

備陳福祥紛委御中天而發號宥率土以均恩書軌所
臻動植咸遂臣退居田里阻覲闕庭徒傾就日之誠莫
預稱觴之列

辭免轉司徒表

明綬忽降寵數併加內自省循交深震慄伏念臣本由
孤進仰會先朝擢居三事之崇謬處衆賢之列當仁祖
御圖之久唯英皇毓德之初於時執政之臣肇啓建儲
之議計安社稷乃惟報國之宜力贊聖明是亦秉均之

職九廟威靈以在上慈闈保佑以居中景命有開大統
終集實由天啓諒非人謀敢伐善以稱功期抱忠而沒
世年踰二紀事歷三朝退安田里之居俯迫桑榆之景
豈意故臣之奏議仰紆當宁之覽觀特簡淵衷遽形褒
詔敷聞華夏震聳縉紳渙大號於明廷霈鴻恩於私室
發自睿斷匪由僉諧特遷五教之司益重三階之秩顧
茲衰朽敢冒寵榮且既往之功復何足錄而非常之澤
義所當辭伏望皇帝陛下俯亮丹誠慎行過賞聽輟出

綸之命免貽據蒞之災重念臣早玷近班素安拙分年
將及耄寵則踰涯已竊位於公槐仍兼華於將鉞當知
止之日豈饗榮之時雖蒙虞帝之念功曷稱武公之善
職由衷之請報可是期

謝明堂加恩表

世室奉祠明庭渙號鴻恩俯被黃髮為榮伏念臣素乏
異能早逢亨會荷三朝之眷遇秉二府之鈞衡徒膺體
貌之隆豈有涓埃之補迨引年而遂請蒙佚老之推慈

獲偃息於故廬幸優游於聖日伏遇皇帝陛下講求國
典親饗明堂對越上靈嚴配昭考受皇天之篤祐擁宣
室之蕃釐麗澤豐融羣生鼓舞薦紳蒙福朽枿回春顧
惟殘槁之姿均被庖鴻之渥矧更新於官制特序正於
文階圖鼎飪之前勞形贊書之厚獎衰悰感槩舊華光
華雖居畎畝之微敢忘天地之施

謝轉司徒表

渙汗難收末由懇避宸章申答重荷褒嘉祇受以還震

惶無措伏念臣早緣末學進齒清朝誤蒙仁祖之知擢
備宰司之位迨英皇之嗣服長樞府以秉均曾無補於
聖猷遂出修於藩職熙寧初載睿哲統天入居論道之
司重辱改容之禮屬嬰疹疾靡效毫分幸賴曲全始終
久遂休佚豈意登儲之請仰關當宁之懷特追念於前
勲俾對揚於休命顧臣何力冒此殊榮此蓋伏遇皇帝
陛下駿惠先猷纂隆下武推至仁而求舊舉懋典以記
功上昭神祖之明丕承文考之志不遺耄齒猶錄微勞

雖貪天之功古有明戒而惟帝之念敢不奉承當仁寧
負於覲顏追孝實彰於睿德昔為羽翼之助者隱不復
顯書龍蛇之詩者死而後知逢時之榮在臣何幸顧迫
桑榆之景曷酬天地之仁

謝男受閤門祇候表

有命自天延賞于世祇奉宸旨弗獲懇辭俯念衰遲豈
勝感慰伏念臣本興孤族幸守素風惟忠孝以傳家非
公侯之繼世致位上宰席寵三朝何圖退老之時猶被

褒功之典中台進秩弱息預榮斷自清衷加於私室此
蓋伏遇皇帝陛下天臨萬寓子育黎元追先帝之升儲
眷輔臣之定策以為固社稷者猶將宥其十世詔爵祿
者所以馭於羣臣體虞帝之寬仁法周家之信厚特推
懋賞以及貳宗因垂勸於將來故深矜於舊物臣敢不
知恩所自重義於生雖典謁無能益勵教忠之訓儻析
薪克負俾酬及幼之仁

辭免冊命表

君牙拜命祇聖訓以奉承史佚贊辭在臣工而曷稱輒
殫悃幅上冒高明伏念臣起自諸生謬塵三事之代天
之遠用竊浮實之隆榮眷求輔政之初嘗有登儲之請
因推懋賞追錄微勞矧惟告老之人當避涓辰之禮伏
望皇帝陛下特廻睿聽俯徇私誠罷法宸之臨軒寢明
庭之發冊庶安止足之分免昭過溢之尤

慰慈聖光獻太皇太后大祥表

再暮之喪三代所共禮制有限聖情無窮適臨祥事之

辰深切永懷之感伏惟皇帝陛下奉先思孝追遠厚民
體高宗之宅憂同大舜之終慕上尊祖統虔遵服重之
文仰法天時俯就立中之制淵衷軫念率土同哀臣以
告老不獲奔詣闕庭云云

遺表

臣竊以天地者生成之本故物終必復其初君父者倫
類之先故人死不忘其報垂沒之懇泣血以陳伏念臣
夙以薄材起於孤族思有為於當世竊志學於古人進

會休明寢躋華顯奉使方強之敵馳身不測之淵仰憑
宗廟之靈復繼先皇之好仁皇帝以臣粗知忠義嘗冒
險難擢自諸生俾司大政英皇纘服慈后臨朝入長天
樞助宣聖化陛下大明繼照睿哲統臨祇適先猷眷求
舊物延登三事委總萬機任遇不殊於兩朝優禮實冠
於羣后而臣拙謀無補衰疾有加乏期月之成功幸帝
心之妙簡守藩無狀報政蔑聞俄得請以告歸俾養痾
而自便曲全終始許遂退休間者聖孝奉先皇明燭隱

尚忝策勲之拜特遷掌教之司而臣沈瘵日侵頽齡愈
迫蓋桑榆之向盡非藥石之可瘳重念臣歷事三朝辭
榮一紀年登八十位正三公進則光顯於朝廷退則安
佚於田里在臣揣分何啻踰涯故雖喘息之僅存唯抱
忠誠而不已臣常思竭股肱之力繼之以死徇國家之
急奮不顧身苟蹈義而可為雖沈族而不悔今乃幸終
牖下獲盡天年將歸窀穸之墟莫效糜捐之節顧瞻白
日睠戀明時受恩不貲圖報無所伏望皇帝陛下欽承

寶命光宅慶基養氣志以如神憲聰明而作后臨下以
簡守位以仁躋俗雍熙之期納民富壽之域臣雖瞑目
猶生之年臣永辭聖世無任瞻天戀聖激切屏營之至

代范堯夫辭給事中兼侍講表

右臣準閤門報已降告命除臣給事中兼侍講者臣竊
以門下封駁之職實惟出納之司苟非公忠正直之人
無以振舉綱條論議得失選任所重實難其才伏望陛
下日親儒臣啓發聖學勸講帷幄敷陳典訓必得經術

行誼之士厚重端方之臣緝熙光明陪侍左右臣久去
朝廷待罪外官識智闇淺記問涉獵加以衰遲心神耗
廢學憂不講經患不明將何以供奉禁密仰承訪逮兼
是二職皆非所堪聞命震慄靡所自容又臣與司馬光
舊為姻戚臣隸左省義亦有嫌伏乞天恩聽許引避亟
收誤寵遴簡衆賢必得時髦以副眷委所有告命不敢
祇受

代楊中散遺表

臣聞生則盡忠乃人臣之常守沒猶有戀惟君父之難忘輒陳忍死之言仰瀆蓋高之聽伏念臣早由科舉進齒仕途慎守詔條悉心民政惟謹廉而潔已闕勤恪以在公未嘗枉道以事上官附勢而取高位宰司五邑典守三州雖無可紀之能薄有見思之愛徒積勞於歲閱遂升秩於卿曹洛邑分臺蓋免守麾之責祠庭領職蓋懷尸祿之慙伏遇宗祀熙成鴻恩普被更新官制數錫臣工特易文階仍疇封邑而臣顏光已薄衰病內侵香

杳重泉將歸於幽壤昭昭白日永謝於明時顧無論報
之因徒切哀鳴之懇伏望皇帝陛下御中和於六氣同
長久於二儀聚會百祥覆庇四海臣雖瞑目猶生之年
重念臣自歷官途踰五十載未嘗被監司之刺舉煩朝
憲之譴訶內揆始終實無愧悔猶希漏澤俯及微宗輒
瀝悃誠敢援故實臣今有孫男某粗承家訓未齒官榮
伏望聖慈特賜於文資內安排臣永荷及泉之恩敢忘
結草之報臣無任瞻天戀聖激切屏營之至

代唐通直提點利州路刑獄謝上表

中宁頌恩外臺領使載驅傳遽已案部封祗荷甄升伏
增震悸伏念臣材資最下術業無聞徒服教於義方遂
策名於士路備員冗吏絕意榮階蒙召對於燕閒獲親
聆於謨訓會有嶠南之役俾為湖外之行唯罄忠勤懼
辜選使擢參公掾旋屬家艱起哀疚之餘生貳轉輸於
外計猥惟孤進盡出淵衷當右輔之劇煩顧小材之綿
薄一塵官次三換歲華曾無奏最之能宜被黜幽之典

敢期易地仍委案刑叨任使之寢隆荷寵靈之下矚惟
岷梁之舊域邇庸蜀之奧區封壤雖遐獄訟素簡俯容
策勵分職糾虔此蓋伏遇皇帝陛下剛健博臨高明廣
照總覈英髦之效不遺疎遠之臣特叔轉餉之微勞進
備宣條之乏使臣敢不上體欽恤志期肅清俾山谷之
遐氓識朝廷之惠澤益殫犬馬之力圖報天地之私臣
無任云云

代楚待制謝再任崇福宮表

宸扆頒恩琳宮分職載循衰朽祇荷寬優伏念臣世緒
單平天資闇淺誤膺煩使寢履榮塗曾無尺寸之長諒
乏涓埃之補延登天閣久塵侍從之班委總价藩荐被
干城之寄自戍歸於外間獲退領於祠庭屢易歲華坐
糜祿廩及茲滿秩輒復冒聞敢期從欲之仁特遂庇身
之請此蓋伏遇皇帝陛下至仁天覆大德海容無一物
之遐遺俾羣生之咸若故雖蒲柳之質猶霑雨露之私
冀竭微誠仰酬洪造

代忠文公遺表

臣聞生也有涯卒隨於物化人之將死尤切於情言易
簣以正其終視壙而知所息敢忘忠懇仰列睿聰伏念
臣起自孤生出逢華旦蚤備諫垣之職誤膺仁祖之知
入三朝之禁林侍二帝之經席堅一心而事上冒萬死
以進言荷山海之兼容返耕桑而自樂伏遇陛下大明
出震盛德承祧延登正人眷求舊物錄臣初議進陟峻
班遠追尚齒之風特降邇英之召而臣已不任於筋力

阻趨覲於威顏既獲懇辭復遂休佚竊惟禮樂之大實
繫國家之隆臣在先朝嘗陪末議是敢輒伸所學猶惜
餘生克諧金石之音仰備廟堂之奏方志願之永畢迫
年齡之已頽儻聖作明述之有成則朝聞夕死而無憾
伏望皇帝陛下日躋聖敬時憲聰明畜德新其輝光典
學念於終始刑孝風於四海冒仁澤於羣生追堯舜之
隆名揚祖宗之大烈臣雖瞑目猶生之年臣永辭聖世
無任悲戀激切屏營之至

上太皇太后表

臣聞自古有死乃前聖之訓言君子曰終亦先賢之志
願啓手足而知免視丘原而與歸猶陳垂沒之誠上達
蓋高之聽伏念臣本由孤進素乏異能被遇仁皇擢居
諫省期於死職不敢愛身暨蒙英祖之知再入禁林之
直神宗皇帝召從近輔復寘邇聯唯堅一心如事二帝
辱賜骸骨許歸田廬荷天地之兼容戴丘山而莫報犬
馬之齒踰八十年麋鹿同遊幾二十載伏遇陛下翊扶

真聖保佑丕基登進羣賢眷求遺老錄至和之初議加
祕殿之華資仍推延世之恩以及負薪之息召陪經幄
起領祠宮特矜枯朽之餘再遂佚休之請得以攷正鍾
律之法講明禮樂之原莫獲造庭克諧奏御方同百獸
之舞未覩三雍之成而臣年已迫於桑榆疾無瘳於藥
石將歸黃壤難戀明時方今天人和同夷夏歡悅功莫
高於任如俗將躋於成康儻制作之有期雖隕越而無
恨伏望太皇太后陛下深惟廟社之重仰對祖宗之休

澄宸慮於繁機納天和於沖氣加膳玉食頤神法宮永庇烝民之生益隆萬壽之祉臣永辭聖世無任悲戀激切屏營之至

代呂正獻公遺表

臣竊以死不忘君乃人臣之常節窮則反本惟生物之大情雖餘喘之至微猶孤忠之未泯伏念臣早由末學進備邇聯重膺累聖之知克紹前人之烈材力不逮豈期位列於三公氣血早衰敢望年踰於七十伏遇陛下

踐盛德之阼擁無疆之休思庶政之惟艱圖舊人而共
濟給扶以登文石之陛特班以拜大昕之朝顧未能致
主於唐虞躋民於仁壽慚無補袞之效已迫首丘之期
伏望皇帝陛下思先帝之緒以遺大投艱奉文母之訓
以永世克孝不替詢謀於黃髮勿忘視戒於丹書作德
日新務學時敏無為以守至正好問而察邇言崇成聖
功永對宗祏臣沒而不朽尚依日月之末光死者有知
雖為泉壤而受賜臣無任瞻天戀聖激切屏營之至

上太皇太后表

臣聞學不義生古皆有死惟歸全而知免乃得正以告
終敢忘垂絕之言上冒蓋高之聽伏念臣夙聞前訓早
服近僚席累世之弓箕備六朝之鼎鉉升降相與休戚
是同伏遇陛下思齊任如之功誕保成康之聖延登衆
正共濟多難而臣入侍經帷進陪冢席獨膺一相之任
愧乏三年之成屢陳請老之言歷罄避賢之懇重辱改
容之禮特躋論道之司同軍國之謀謨參師保之輔導

尚貪天寵往踐世官唯高位之疾顛矧羸軀之多病僅
存殘喘猶抱孤忠雖深軫於慈宸訖無瘳於眩藥伏望
太皇太后陛下儲神蠖濩澄慮穆清疇咨哲人之良願
謁祖宗之憲納民仁壽躋俗雍熙則臣雖委骨於重泉
猶銜恩於永世臣無任瞻天戀聖激切屏營之至

范太史集卷八